

*Տաթևիկ Վարդանի Ենոքյանի «Կրտսեր դպրոցականների հաղորդակցական կարողությունների ձևավորումը մայրենիի դասերին» խորագրով ատենախոսության մասին՝ ներկայացված ՏԳ. 00. 02 - «Դասավանդման և ուսուցման մեթոդիկա (մայրենի)» մասնագիտությամբ մանկավարժական գիտությունների թեկնածուի գիտական աստիճանի հայցման համար*

Հաղորդակցումը ոչ միայն լեզվամտածողության դրսևորում է, այլև հասարակության մեջ ապրելու, բնականոն կենսագործունեություն ապահովելու կարևոր պայման: Ճիշտ հաղորդակցումը վկայում է խոսողի լեզվագրացողության, ճանաչողական կարողությունների, խոսքի ոճական, գործառնական, գեղագիտական արժեքի ընկալման մշակույթի, խոսքային գործունեության դրդապատճառների ձևավորվածության մասին: Հաղորդակցման կարողության ձևավորումը մանկավարժական գիտության և դասավանդման մեթոդիկայի բնագավառներում արդիական հիմնահարց է, որի կրթադաստիարակչական, սոցիալ-հոգեբանական, մշակութաբանական տեսանկյունները տակավին խոր ուսումնասիրման կարիք ունեն:

Այս տեսանկյունից գրախոսվող ատենախոսության արդիականությունը հիմնավորված է և պայմանավորված է չափորոշահեն կրթության հարացույցում ծրագրային նոր պահանջներով սովորողների հաղորդակցական կարողությունների ձևավորման մեթոդաբանական հիմնավորման անհրաժեշտությամբ:

Հետազոտությունն ունի սոցիալ-մշակութային, հոգեբանամանկավարժական կիրառական նշանակություն: Ատենախոսի մասնագիտական փորձը, տեսական վերլուծություններ կատարելու կարողությունը և գործնական հմտությունները հնարավորություն են տվել գիտատեսական ու մեթոդապես հիմնավորված հետազոտություն իրականացնելու, որն ուշագրավ սկզբունքներ և մոտեցումներ է նախանշում մայրենիի դասերին կրտսեր դպրոցականների հաղորդակցական կարողությունների ձևավորման հիմնախնդրի լուծման գործում: Հետազոտության հիմնահարցերը դիտարկվում են մանկավարժահոգեբանական,

լեզվաբանական, հայոց լեզվի տարրական ուսուցման մեթոդիկայի արդի հիմնադրույթների համատեքստում:

Հստակ սահմանված են հետազոտության բաղադրիչները՝ նպատակը, օբյեկտը, առարկան, վարկածը, խնդիրները, պաշտպանությանը ներկայացվող դրույթները, որոնք բովանդակային առումով համապատասխանում են և հիմնավորված արտացոլված են եզրակացությունների մեջ: Հիմնավորված է հետազոտության գիտագործնական նշանակությունը, հետազոտության արդյունքներն ունեն գործնական-կիրառական ուղղվածություն:

Ատենախոսության՝ «Կրտսեր դպրոցականների հաղորդակցական կարողությունների ձևավորման համակարգը (հիմնահարցի պատմություն)» խորագրով առաջին գլխում հանգամանալից դիտարկված են հաղորդակցական կարողությունների ձևավորման հիմնախնդրի պատմատեսական նախադրյալները: Վկայաբերված պատմաբանասիրական, մանկավարժագիտական աղբյուրները տեղեկատվական հարուստ նյութ են տրամադրել ատենախոսին, որոնցից նա գիտական բարեխղճությամբ հանգամանալից վերլուծել և մեկնաբանել է դեռևս անտիկ դարաշրջանից սկսած հաղորդակցական միջոցների, նշանային համակարգերի ձևավորման պատմատեսական հիմքերը: Հայ և արտերկրի լեզվաբանական, հոգեբանական, հոգելեզվաբանական, փիլիսոփայական-տրամաբանական, մանկավարժական հետազոտությունների հանգամանալից քննությունը բացահայտում է հիմնախնդրի կարևորությունը միջգիտակարգային առումով: Այնուհետև հարցի խոր և բովանդակալից ուսումնասիրությունը տեղափոխվում է տարրական կրթության ոլորտ, որը վկայում է ատենախոսի՝ հիմնախնդիրը բազմատեսանկյուն հետազոտելու կարողության ձևավորվածության մասին: Հաղորդակցական կարողությունների ձևավորման մեթոդական համակարգի բաղադրիչների և գործառույթների քննությունն ուշագրավ խորքեր է բացահայտում լեզվադիդակտիկական տեսանկյունից: Ատենախոսն անդրադարձել է խոսքային միջավայրի, ուսուցչի խոսքի և հաղորդակցման մշակույթի, կրթական գործընթացի սուբյեկտների փոխներգործության, հաղորդակցման դրդապատճառների ձևավորման խնդիրներին: Առաջին գլխում ատենախոսն անդրադարձել է նաև արդի թվայնացված իրականության մեջ տեղեկատվական միջավայրում հաղորդակցմանը, մեդիակրթության, մեդիայի ու մեդիատեխնոլոգիաների դերին, կրտսեր դպրոցական տարիքի առանձնահատկություններին՝ առաջարկելով կառուցողական լուծումներ:

«Կրտսեր դպրոցականների հաղորդակցական կարողությունների ձևավորման գործընթացի բովանդակությունը և դրա առանձնահատկությունները» խորագրով երկրորդ գլխում քննության են առնված տարրական դպրոցում հաղորդակցական կարողությունների ձևավորման նորմատիվային հիմքերը, որոնք ապահովում են չափորոշչահեն կրթության հարացույցում ծրագրային նոր պահանջներով սովորողների հաղորդակցական կարողությունների և վերջնարդյունքների ձեռքբերումն ըստ առաջադրված կրթաբաղադրիչների: Մայրենիի դասագրքերի բովանդակության քննությունը ևս բացահայտում է հաղորդակցման կարողությունների ձևավորման ներուժը՝ ուղեկցված արժեքավոր առաջարկություններով և մեթոդական հանձնարարականներով:

Հիմնախնդրի լուծման արդյունավետությունը, ինչ խոսք, պայմանավորված է ուսուցիչների շրջանում իրականացված հարցախույզի տվյալների վերլուծությամբ, որի արդյունքում ի հայտ են եկել դիդակտիկական, մեթոդական, մանկավարժահոգեբանական և ուսուցիչների վերապատրաստմանն առնչվող մի շարք խնդիրներ: Այս գլխում հանգամանալից վերլուծված են նաև կրտսեր դպրոցականների՝ հաղորդակցման կարողությունների ձևավորման հետ կապված կազմաբնախոսական, նյարդահոգեբանական, լեզվամտածողության, մտագործունեության մի շարք առանձնահատկություններ, նաև կենսամիջավայրի բաղադրիչներ ու գործոններ:

Ատենախոսը հաղորդակցական կարողությունների ձևավորումը դիտարկում է դպրոցականների բանավոր և գրավոր կապակցված խոսքի զարգացման, պատկերավոր լեզվամտածողության, համագործակցային կարողությունների զարգացման, լեզվական նյութի գործնական-հաղորդակցական բնույթի գիտակցված, մտահուզական ընկալման և բառապաշարի հարստացման, իմացական գործընթացների ակտիվացման, լեզվի ուսուցման և խոսքային գործունեության կապի ամրակայման, աշխարհաճանաչողության տեսանկյունից, որը հիմնախնդրային է տեխնոլոգիական հեղաշրջումների ժամանակակից աշխարհում:

«Կրտսեր դպրոցականների հաղորդակցական կարողությունների ձևավորման մեթոդական համալիրը մայրենիի դասերին» խորագրով ենթագլուխն ամփոփում է ատենախոսի մեթոդական գինանոցը և ընդգծում հետազոտության գիտամեթոդական արժեքը: Հիմնավորված է, որ հաղորդակցական կարողությունների զարգացման արդյունավետ միջոց են խոսքային իրավիճակները, էլեկտրոնային և փոխներգործուն խաղ-առաջադրանքները,

իրադրային խաղերը, համակարգչային ուսումնական թեմատիկ համալիր միավորները, մենախոսություն և երկխոսություն ներառող իրավիճակային կրթական խաղերը: Ներկայացված մեթոդական համալիրը՝ բովանդակային, տեխնոլոգիական և ընթացակարգային բաղադրիչների հստակ մշակմամբ, կոնկրետ հանձնարարականներով, բարձրացնում է ատենախոսության գիտամեթոդական արժեքը:

Ատենախոսության տեսագործական դրույթների հիմնավորման վերաբերյալ իրականացված փորձարարական հետազոտությունը, կիրառված գործնական նյութերը աշխատանքի վերլուծական-գնահատողական ամփոփումն են: Կիրառված մեթոդական համալիրի արդյունքում սովորողների հաղորդակցական կարողությունների ձևավորմանը վերաբերող ուսումնասիրությունները և արդյունքների վիճակագրական վերլուծությունը՝ համապատասխան գրաֆիկական լուծումներով, փաստում են մշակված մեթոդական համալիրի մանկավարժական արդյունավետությունը և վկայում են ատենախոսի մեթոդամասնագիտական կարողությունների ձևավորվածության մասին:

Ատենախոսությունն արդիական հնչեղություն և կիրառական արժեք ունեցող ինքնուրույն, ամբողջական հետազոտություն է, վկայում է հեղինակի մասնագիտամանկավարժական, գիտահետազոտական աշխատանք կատարելու կարողությունների ձևավորվածության, գիտական բարեխղճության մասին: Մշակված առաջադրանքներն ու վարժությունները հետաքրքիր են, ինքնատիպ, ունեն ուսումնաճանաչողական և դաստիարակչական արժեք: Պահպանված են գիտահետազոտական աշխատանքի բովանդակային, կառուցվածքային, լեզվաոճական կողմերին ներկայացվող պահանջները:

Այնուհանդերձ կուզենայինք առանձնացնել որոշ նկատառումներ.

1. Ցանկալի կլիներ հատկապես ՏՀՏ-ների կիրառմամբ էլեկտրոնային խաղ-առաջադրանքների իրականացման ուղղությամբ հոգեբանամանկավարժական, սոցիալական, կազմակերպական, առողջագիտական, կազմաբնախոսական, ֆիզիոլոգիական, տեխնիկական անվտանգության ապահովման առումով մեթոդական հանձնարարականներ մշակել, որը շատ օգտակար կլիներ ուսուցիչներին:

2. Շահեկան կլիներ, եթե կրտսեր դպրոցականների հաղորդակցական կարողությունների ձևավորման համատեքստում որոշ չափով անդրադարձ կատարվեր դասավանդվող այլ

առարկաների հետ ինտեգրվող թեմատիկ միավորների ստեղծման և այդ շրջանակներում հիմնախնդրի լուծման համար:

3. Կառուցվածքային առումով նպատակահարմար կլինեն 2.4. ենթագլխի՝ կրտսեր դպրոցական տարիքի առանձնահատկություններին վերաբերող հատվածը գետեղել 1-ին գլխում՝ անջատելով գիտափորձի արձանագրման փուլին նվիրված շարադրանքից:

Մեր կողմից արված նկատառումներն ընդհանուր առմամբ չեն ազդում հետազոտության արժեքի և այն գնահատականի վրա, որին իրավամբ արժանի է աշխատանքը:

Տարևիկ Վարդանի Ենոքյանի «Կրտսեր դպրոցականների հաղորդակցական կարողությունների ձևավորումը մայրենիի դասերին» խորագրով ատենախոսությունը համապատասխանում է ՀՀ գիտական աստիճանաշնորհման կանոնակարգի 7-րդ կետի պահանջներին և ԲՈԿ-ի կողմից ԺԳ. 00. 02 - «Դասավանդման և ուսուցման մեթոդիկա (մայրենի)» մասնագիտությամբ մանկավարժական գիտությունների թեկնածուի գիտական աստիճանի հայցման համար ներկայացվող պահանջներին, և հեղինակն արժանի է հայցած գիտական աստիճանին:

Պաշտոնական ընդդիմախոս  
մանկ. գիտ. թեկնածու, դոցենտ

Գ. Զ. ԶԱԿՈՒԲՅԱՆ

Գ. Զ. Զակոբյանի ստորագրությունը հաստատում եմ՝  
Խ. Աբովյանի անվան Հ. ՊՈՅՆՔԻ ԱԿԱԴԵՄԻԱԿԱՆ ԳԻՏԱԿԱՆ  
ՄԱՍՆԱԳԻՏՈՒԹՅԱՄԲ ՄԱՆԿԱՎԱՐՇԱԿԱՆ ԳԻՏՈՒԹՅՈՒՆՆԵՐԻ  
ԹԵԿՆԱԾՈՒԻ ԳԻՏԱԿԱՆ ԱՍՏԻՃԱՆԱՇՆՈՐԻ ԿԱՆՈՆԱԿԱՐԳԻ 7-ՐԴ ԿԵՏԻ



Մ. Ս. ԻՍՄԻԻԼՅԱՆ

18 10. 2023 թ.